

四庫全書

史部

欽定四庫全書

隸釋卷二十二

宋 洪适 撰

王元賞碑

元節碑

竹邑侯相張壽碑

無名碑

司隸楊君碑

孔君碑

費府君碑

樊毅華嶽碑

北嶽碑

碑陰題名

慎令劉君墓碑

伯著碑

索良碑

王稚子闕

堯祠碑

碑陰題名

張公廟碑

碑陰題名

西嶽華山廟碑

孔德讓碣

孔宙碑陰題名

楊震碑陰題名

唐君碑

熊君碑

敬仲碑

衡方碑

俞鄉侯季子碑

堯祠祈雨碑

景君碑

景君石郭銘附

郝閣頌

費鳳碑

魏受禪壇碑

魏公卿上尊號表

集古錄下

王元賞碑

右王元賞碑云君諱某字元賞御史君之孫茂材君之子也歷秦及漢有國有家宰相牧守踵武相襲又曰遭

父喪以孝行稱土堦環堵兼業並授門徒雲集盛於  
洙泗又云郡察孝廉郎中謁者宛陵丞封丘令母憂  
去官服祥辟司空府延熹四年五月辛酉遭命而終  
其文字磨滅隱隱可見者如此其名既亡又不序其  
姓惟其銘云於惟王君以此知其姓王爾治平元年  
五月二日書

元節碑

右元節碑文字磨滅不見其氏族其可見者纔數十

字爾云君諱立字元節其先出自伊尹其餘不復成  
文其銘云於穆從事疑其姓伊而為從事也碑無年  
月而知為漢人者以其隸體與他漢碑同爾治平元  
年五月二日書

竹邑侯相張壽碑

右竹邑侯相張壽碑云君諱壽字仲吾其先晉大夫  
張老盛德之裔孝友恭懿明允篤信博物多識略涉  
傳記臨疑獨照確然不撓有孔甫之風舉孝廉除郎

中給事謁者遷竹邑侯相年八十建寧元年五月辛酉卒其大略可見者如此其餘殘闕或在或亡亦班班可讀爾治平元年端午日書

無名碑

右無名碑文字磨滅其姓氏名字皆不可見其僅可見者云州郡課最臨登大郡又曰居喪致哀曾參閔損又曰辟司隸從事拜治書侍御史又曰奮乾剛之嚴威揚哮虎之武節又曰年六十三光和四年閏月

庚申遭疾而卒其餘字畫尚完者多但不能成文爾  
夫好古之士所藏之物未必能適世之用惟其埋沒  
零落之餘尤以為可惜此好古之僻也治平元年六  
月五日書

司隸楊君碑

右司隸校尉楊厥碑云惟坤靈定位川澤服躬澤有  
所注川有所通余谷之川其澤南隆八方所達益域  
為充高祖受命興於漢中道由子午出散入秦建定



帝位以漢詆焉後以子午塗路澁難更隨圍谷復通  
堂光凡此四道堦曷允艱至於永平其有四年詔書  
開余鑿通石門中遭元二西夷虐殘橋梁斷絕子谷  
復循於是故司隸校尉犍爲武陽楊厥字孟文深執  
忠伉數上奏請廢子由斯得其度經至建和二年漢  
中大守王升字稚紀嘉君明知美其仁賢勒石頌德  
以明厥勲其辭大略如此其刻畫尚完可讀大抵述  
厥修復斜谷路爾但其用字簡省復多舛繆惟以

爲坤以余爲斜漢人皆爾獨詆字未詳永平明帝建  
和桓帝年號也

孔君碑

右孔君碑其名字磨滅不可見而世次官閥粗可考  
云孔子十九代孫潁川君之元子也舉孝廉除郎中  
傳昌長遭太守君憂服竟拜尚書侍郎治書御史博  
陵太守遷下邳相河東太守建寧四年十月卒其餘  
文字歷歷可讀以其斷絕處多文理難續故不復盡

錄然其終始略可見矣惟其名字皆亡爲可惜也治平元年五月十日書

費府君碑

右梁相費府君碑其名字若云諱況字仲慮而況疑爲汎慮疑爲寬其官閥可見者爲蕭令九年沛有蝗獨不入其界國以狀聞朝廷嘉諸拜梁相春秋八十卒其銘頗簡而粗完云穆穆顯祖厥德懿鑠播勲於前丕碩基業遺愛於民福流後祚自此八字已減不

可識卒章云功烈休矣來昆戮力而穆為甌古文多  
如此也熙寧二年十一月十六日山齋書

樊毅華嶽碑

右樊毅華嶽碑云泰華之山削成四方其高五千仞  
廣十里周禮識方氏華謂之西嶽祭視三公者以能  
興雲雨產萬物通精氣有益於人則祀之故帝舜受  
堯親自巡省暨夏殷周未之有改秦違其典璧遺鄙  
池二世以亡漢祖應運遵陶唐祭則獲福亦世克昌

亡新滔逆鬼神不享建武之初彗掃頑凶光和二年有漢元舅五侯之胄謝陽之孫曰樊府君諱毅字仲德命守斯邦孟冬十月齋祠西嶽以傳窄狹不足處尊卑廟舍舊久墻屋傾堙特部行事荀班縣令先讜以漸補治此其事也又云功曹郭敏等遂刊玄石銘勒鴻勲其字畫頗完其文彬彬可喜惟以周禮職方為識方氏其字畫分明非訛闕疑當時周禮之學自如此蓋識誌其義皆通也治平元年五月十日

書

北嶽碑

右北嶽碑文字殘滅尤甚莫詳其所載何事第其隱  
隱可見者曰光和四年以此知為漢碑耳其文斷絕  
不可次序多言珪幣牲酒黍稷豐穰等事似是禱賽  
之文其後有二人姓名偶可見云南陽冠軍馮巡字  
季祖甘陵夏方字伯陽其餘則莫可考矣治平元年  
五月十日書

碑陰題名

右碑陰題名在閩鄉楊震墓側文字磨滅不復可考其僅可見者曰侯長汾陰趙遺子宣侯上滅一字又曰故督郵曹史縣功曹鄉部史栢昱等人名鄉上又滅一字又曰西鄉亭長栢昱子政又曰鄉亭長翟國相如鄉上又滅一字又曰麟都亭長陰定安定谷口亭長方文雅方上又滅一字東門亭長梁忠子孝四望亭長吳鴻子名麟武亭長常嵩君宣其餘闕裂不

完蓋楊氏子孫當時皆葬閩鄉碑碣往往磨滅此不知為誰碑也治平元年五月二十日謝雨致齋於太社書

慎令劉君墓碑

右慎令劉君墓碑在今南京下邑其名已磨滅其字伯麟少罹艱苦身服田畝舉孝廉除郎中辟從事司徒掾遷慎令卒年六十有二其銘曰於惟君德忠孝正直至行通洞高明柔克鬼神福謙受茲介福知命



不延引輿旋歸忽然輕舉志激拔葵人皆有亡貴終  
譽兮歿而不朽垂名著兮余家漢碑常患其銘多闕  
滅而斯銘偶完故錄之

伯著碑

右伯著碑者在今宿州出於近歲蓋宮部春夫開汴  
渠於泥沙中掘得之其文字古怪而磨滅無首尾了  
不可讀伯著不知為何人其僅可見者云渤海君玄  
孫季景長子也其事迹不可考文辭莫曉而字畫不

工徒以其古怪錄之此誠好古之弊也治平元年七月三十日

袁良碑

右袁良碑云君諱良字卿卿上一字滅陳國扶樂人也厥先舜苗世為封君周興虞闕父自此而滅又云滿為陳侯至玄孫濤塗以字立姓曰袁自此又滅又云當秦之亂隱居河洛高祖破項寔從其策天下既定還宅扶樂蓋不知為何人也又云孝武征和三

年曾孫斬賊先勇拜黃門郎曾孫滅其名賊下亦滅一字又曰封關內侯食遺鄉六百戶薨子經嗣經薨子山嗣傳國三世至王莽而絕君即山之曾孫也舉孝廉郎中謁者將作大匠丞相令廣陵太守討江賊張路等威震徐方謝病歸家孝順初初下數字滅又云府舉君拜議郎符節令其後又云永建六年二月卒其碑首題云漢故國三老袁君碑而碑文有使者持節安車又有几杖之尊袒割之養君實

饗之之語以此知良嘗為三老矣其餘磨滅雖時時可讀而不能次第也又云帝御九龍殿引對飲宴九龍殿名惟見於此治平元年五月二十九日夏至假書

王稚子闕

右漢人闕銘二其一曰永樂少府賈君闕其一曰雒陽令王君闕二者皆不知為何人按漢書桓帝母孝宗匣皇后居永樂宮和平元年詔置太僕少府如長

樂故事又按顏師古注地理志曰魚豢云漢火行忌水故云洛水加佳師古謂光武以後始改為雒然則二人者皆後漢時人也又按漢官儀長樂少府以宦者為之則賈君益亦宦者也治平元年九月十五日書

堯祠碑

右堯祠碑在濟陰碑云帝堯者蓋昔世之聖王也又曰聖漢龍興纂堯之緒祠以上犧至於王莽絕漢之

業而壇場夷替屏攝無位大抵文字磨滅字雖可見而不復成文其後有云李樹連理生於堯祠太守河南張寵到官始初出錢二年敬致禮祠其餘不能讀也碑後有年月蓋熹平四年建也治平元年五月晦日書

碑陰題名

右碑陰題名不知為何人碑余家集錄古文既多或失其所得之自然漢碑存於今者惟華嶽與孔子廟

最多其陰往往列修廟人姓名并記其所出錢數不  
過三百至五百今斯碑所題文字闕減而中間有錢  
各五百四字則似是修廟人所記其人可見者有濟  
陰定陶蔡顥子盛山陽金鄉張諺孝德河南宛陵趙  
堂世萇南陽南鄉鄧升升遠濟陰成武周鳳季節而  
其餘人姓名邑里多不完又時時有故吏字不知為  
何人祠廟第以漢隸難得錄之爾治平元年閏五月  
八日書

張公廟碑

右張公廟碑在黎陽而碑無題首又其文字殘滅不可  
考究莫知為何碑第時時得其字之可識而僅成文者  
曰惟和平元年正月丙寅和平桓帝年號以此知為漢  
碑也又曰豐碑廟堂之前又曰於穆張公則又知為張  
公廟碑矣又云國無災寇屢復豐年作歌九章頌公德  
芳其辭有云公與守相駕蜚魚往來倏忽遠燾娛祐此  
兆民寧厥居其餘字畫尚完者甚多但不成文爾治平



元年閏五月九日書是日奏事垂拱退召赴延和閣謝  
契丹禮物遂歸休

碑陰題名

右碑陰題名二皆不知為何碑陰其人各記所出錢數  
似是漢時修廟人題名余家集錄華嶽及孔子廟碑多  
如此此亦疑是二廟中碑前碑殘滅尤甚第時有門生  
濟南東郡等字而姓名無復完者後碑則有議曹功曹  
騎吏有蓮勺左鄉有秩池陽左鄉有秩池陽集丞有秩

皆不知是何名號又有夏陽侯長祿祠候長則是縣吏之名其隸字不甚精又無事實可考姑錄其名號以俟知者爾治平元年閏五月九日書

### 西嶽華山廟碑

右西嶽華山廟碑文字尚完可讀其述自漢以來高祖初興改秦淫祀太宗承循各詔有司其山川在諸侯者以時祠之孝武皇帝修封禪之禮巡省五嶽立宮其下宮曰集靈宮殿曰存仙殿門曰望仙門中宗之世使者

持節歲一禱而三祠後不承前至於亡新寢用丘虛建武之元事舉其中禮從其省但使二千石歲時往祠自是以來百餘年所立碑石文字磨滅延熹四年弘農太守袁逢修廢起頓易碑飾闕會遷京兆尹孫府君到欽若嘉業遵而成之孫府君諱璆其大略如此所謂集靈宮者他書皆不見惟見此碑則余之集錄不為無益矣  
治平元年閏月十六日書

孔德讓碣

右孔德讓碑蓋其名已磨滅但云字德讓者宣尼公二十世孫都尉君之子也仕歷郡諸曹史年二十永興二年七月遭疾不祿碑在今兗州孔子墓林中永興孝桓帝年號也其人早卒無事蹟可考余集錄所藏孔林中碑最後得此遂無遺者蓋以其文字簡少無事實故世人遺而不取獨予家有之也治平元年閏五月二十日書

孔宙碑陰題名

右孔宙碑陰題名漢世公卿多自教授聚徒常數百人其親授業者為弟子轉相傳授者為門生今宙碑殘闕其姓名邑里僅可見者纔六十二人其稱弟子者十人門生者四十三人故吏者八人故民者一人宙孔子十九世孫為太山都尉自有錄治平元年閏五月二十一日書

楊震碑陰題名

右楊震碑陰題名者一百九十人其餘磨滅不完者又

十餘人余家所錄漢碑陰題名頗多或稱故吏門生弟子或稱從事曹掾之類其人皆著州縣邑里名字甚詳獨此碑所書簡略直云河間賈伯錡博陵劉顯祖之類凡百九十人者皆然疑其所書皆是字爾蓋後漢時人見於史傳者未嘗有名兩字者也漢隸世所難得幸而在者多殘滅不完獨此碑刻畫完具而隸法尤精妙甚可喜也治平元年中伏日書

唐君碑

右唐君碑其名已磨滅其字正南云潁川鄆人也其先  
出自慶都感赤龍生堯王有天下苗胄枝分相土視居  
因氏唐焉君父孝廉郎中早卒君繼厥緒耽道好古敦  
書味詩守舞陽丞潁陽令察能治劇遷豫章其後遂復  
磨滅文字班班可見而不能得其次序其後又云掇君  
昌陽令吏民慕戀牽君車輪不得行君臣流涕道路琅  
玕是故從事郡掾刊石樹頌歌君之美據此蓋縣令去  
思碑爾其後又云光和六年二月壬午朔二十五日丙

午則知唐君為後漢時人矣治平元年閏五月二十八日書

熊君碑

右熊君碑云君諱喬字舉舉上減一字其官闕不可詳考其僅可知者劉表時為綏民校尉後遷騎都尉建安二十一年卒享年七十有一其辭有云治歐羊尚書其字非訛闕而以陽為羊蓋古文字少故須假借至漢字已備而猶假用何哉後云太歲在申申上減一字以歷



推之當是丙申又云碑師舂陵福造福上滅一字當是其姓其書顯字皆為顯按許慎說文顯從𣎵聲而轉為累其失遠矣莫曉其義也熙寧二年十月晦日山齋記

敬仲碑

右敬仲碑者其姓名字皆不可見惟其初有敬仲二字尚可識故以寓其名爾蓋疑其人姓田氏也大抵文字磨滅比其他漢碑尤甚字可識者頗多第不成文爾惟云州郡課最臨登大郡又云居喪致哀又云司隸從事

治書侍御史又云光和四年閏月庚申此數句粗可讀  
爾其餘字畫僅完者以漢隸今為難得錄之爾治平元  
年閏五月二十九日書

衡方碑

右衡方碑云府君諱方字興祖其先伊尹在殷號稱阿  
衡因而氏焉又曰州舉孝廉除郎中即丘侯相膠東令  
州舉尤異遷會稽東部都尉又拜議郎北平太守遷潁  
川太守又曰拜步兵校尉年六十有三建寧元年二月

五日癸丑卒於是海內門生故吏采嘉石樹靈碑鐫茂  
伐秘將來此其始終之大略其餘歷歷可見而時亦磨  
滅以其文多不備錄也治平元年六月三日書

俞鄉侯季子碑

右俞鄉侯季子碑云君諱熊字孟孟下闕一字廣陵海  
西人也厥祖天皇大帝垂精接感篤生聖明子孫享之  
分源而流枝葉扶疎出王別肩受爵列土君光武皇帝  
之玄廣陵王之孫俞鄉侯之季子也由是而後文字闕

滅其稍稍可讀者時得其一二云六籍五典如源如泉  
既練州郡卷舒委隨化流南城政猶北辰三祀有成來  
臻我邦仁恩如冬日威猛烈炎夏吏民愛若慈父畏如  
神明其後又云采摭謠言作詩三章據碑文無卒葬年  
月而其辭若此似是德政碑按後漢書光武皇帝子曰  
廣陵思王荆荆子元壽等四人皆封鄉侯而不載其名  
俞鄉侯者不知為思王荆之第幾子也治平元年六月  
五日書

堯祠祈雨碑

右堯祠祈雨碑首尾殘滅其僅可識者有云股肱賢良  
廣祈多福虔虔夙夜又云常以甲子日詔大常陳上古  
之禮舞先王之樂又云延熹十年仲春二月陽氣侵陰  
又云享祀羣神仰瞻雲漢又云嘉澍優沾利茂萬物又  
云孟府君知堯精靈與天通神修治大殿以此知為祈  
雨於堯祠也堯祠在漢濟陰郡孟府君者當是濟陰郡  
太守也其餘隸字完者頗多亦往往成句但斷絕不可

次序爾治平元年六月六日書

景君碑

右景君碑尤磨滅惟謁者任城景君數字尚完其餘班班可見者皆不能成文故其年世壽考功行卒葬莫可考也蓋漢隸今尤難得其磨滅之餘可惜爾熙寧二年十月晦日山齋書

景君石郭銘附

右景君石郭銘余既得前景君碑又得此銘皆在任城

不知一景君乎將任城景氏之族多耶文字磨滅不可  
考故附于此熙寧三年正月朔旦山齋記

鄘閣頌

右析里橋鄘閣頌建寧五年立云惟斯析里處漢之右  
溪源漂疾橫柱于道涉秋霖漉稽滯商旅休謁往還常  
失日畧行里咨嗟郡縣所苦斯溪既然鄘閣尤甚臨深  
長淵三百餘丈接木相連號為萬柱遭遇隕人物俱  
隋沈沒洪淵酷烈為禍於是太守河陽李君諱會字伯

都以建寧三年二月辛巳到官思惟惠利有以綏濟聞  
此為難其日久矣乃俾府掾仇審改解危殆即便求隱  
析里大橋於爾乃造又驛散關之嘲漂徙朝陽之平慘  
減西高閣就安寧之石道禹導江河以靖四海經紀厥  
績艾康萬里乃作頌曰頌後又有詩皆磨滅不完其云  
遭遇隤納又云驛散關之嘲漂徙朝陽之平慘刻畫適  
完非其訛謬而莫詳其義疑當時人語與今異又疑漢  
人用字簡略假借不同爾故錄之以俟博識君子治平



元年六月十日書

費鳳碑

右費鳳碑云字伯蕭梁相之元子也漢安二年舉孝廉  
拜郎中除陳國新平長又云試守故障茲其文班班可  
見而卒葬年壽皆不載其後悉為五言韻語其略曰不  
悟奄忽終藏形而匿景耕夫釋耒耜桑女投鉤莒道阻  
而且長坐起淚如雨其文既非工故不悉錄熙寧二年  
十一月十六日山齋書

魏受禪壇碑

右魏受禪碑世傳為梁鵠書而顏真卿又以為鍾繇書  
莫知孰是按漢獻帝紀延康元年十月乙卯皇帝遜位  
魏王稱天子又按魏志是歲十一月葬士卒死亡者猶  
稱令是月丙午漢帝使張惛奉璽綬庚午王升壇受禪  
又是月癸酉奉漢帝為山陽公而此碑云十月辛未受  
禪於漢三家之說皆不同今據裴松之注魏志備列漢  
魏禪代詔冊書令羣臣奏議甚詳蓋漢實以十月乙卯

策詔魏王使張惔奉璽綬而魏王辭讓往反三四而後受也又據侍中劉廙奏問太史令許芝今月十七日己未可治壇場又據尚書令栢階等奏云輒下太史令擇元辰今月二十九日可登壇受命蓋自十七日己未至二十九日正得辛未以此推之漢魏二紀皆謬而獨此碑為是也漢紀乙卯遜位者書其初命而略其辭讓往反遂失其實爾魏志十一月癸卯猶稱令者當是十月行一字爾丙午張惔奉璽綬者辭讓往反容有之也惟

庚午升壇最為謬爾癸卯去癸酉三十一日不得同為十一月此尤謬也禪代大事也而二紀所書如此則史官之失以惑後世者可勝道哉嘉祐八年九月十七日書


魏公卿上尊號表

右魏公卿上尊號表唐賢多傳爲梁鵠書今人或謂非鵠也乃鍾繇書爾未知孰是也嗚呼漢魏之事讀其書者可爲之流涕也其巨碑偉字其意惟恐傳之不遠也

豈以後世為可欺歟不然不知恥者無所不為乎

右歐陽公集古錄二卷公名修字永叔廬陵人平生嗜古有歷代石刻一千卷軸而藏之撮其大要為之說既刻而傳於世矣嘉祐治平年公在政府時又各書其卷尾文或小異蓋竄定有先後也凡說漢隸者今錄之張平子碑南陽秦君額皆篆也左右生題名非文翁學生也故去之其間姓名官稱歲月文辭考證之誤者視隸釋則可見也千卷之藏其傳不一再

世而靡有孑遺矣聚之難而散之易如此惜哉



隸釋卷二十二

欽定四庫全書

史部  
隸釋卷二十三

詳校官編修<sub>臣</sub>潘庭筠

編修<sub>臣</sub>程嘉謨覆勘

總校官進士<sub>臣</sub>繆琪

校對官中書<sub>臣</sub>李斯咏

謄錄監生<sub>臣</sub>蕭準



欽定四庫全書

隸釋卷二十三

宋 洪适 撰

集古錄目

集古錄既成之八年家君命棐曰吾集錄前世埋沒缺落之  
文獨取世人無用之物而藏之者豈徒出於嗜好之僻而以  
為耳目之玩哉其為所得亦已多矣故嘗序其說而刻之又  
跋於諸卷之尾者二百九十六篇序所謂可與史傳正其闕

謬者已粗備矣若撮其大要別為目錄則吾未暇然不可以闕而不備也棐退而悉發千卷之藏而考之曰嗚呼可謂詳矣蓋自文武以來迄於五代盛衰得失賢臣義士姦雄賊亂之事可以動人耳目者至於釋氏道家之言莫不皆有然分散零落數千百年而後聚於此則亦可謂難矣其聚之既難則其久也又將遂散而無傳宜公之惜乎此也於是各取其書撰之人事迹之始終所立之時世而著之為一十卷以附於跋尾之後夫此千卷之書者刻之金石託之山崖

未嘗不為無窮之計也然必待集錄而後著者豈非以其繁而難於盡傳哉故著其大略而不道其詳者公之志也熙寧二年二月記

沛相楊君碑

右不著書撰人名氏楊君震之後也孝順帝時以掾史召拜郎中累遷沛相建寧中卒碑為隸字首尾不完失其名字矣碑在閩鄉震墓側

楊君碑陰題名

右不著書人名氏碑首尾不完今可見者四十餘人各有出錢數楊氏數世皆葬闕鄉此碑有稱後公門生者有稱沛君門生者不知何人碑陰也後公義不可知沛君所謂沛相者也碑在陝府闕鄉

郭先生碑

右隸書不著書撰人名氏書字甚古蓋漢碑也先生名輔字甫成荊州人碑在襄州穀城縣

魏受禪壇記

右隸書不著書撰人名氏世傳以為鍾繇書或以為梁鵠書魏文帝黃初元年為壇於繁昌以受漢禪碑不著所立年月在許州魏文帝廟中

魏公卿上尊號表

右不著書撰人名氏字與受禪壇記同漢既禪位文帝未受魏相國安樂鄉侯華歆等上表勸進碑在許昌

楊震碑

右隸書不著書撰人名氏其前不完碑首題曰漢太尉

楊公神道碑銘震安帝時位至太尉碑在陝府閩鄉縣  
繁陽令楊君碑銘

右漢隸不著書撰人名氏殘缺不完不見其名字其可  
見者曰富波君之小子據楊震碑考之富波侯相名牧  
震之子也碑在陝府閩鄉

高陽令楊君碑

右漢隸不著書撰人名氏首尾不完不見名字據碑嘗  
為高陽令最後為善

上一字闕

侯相而碑額但曰高陽令楊

君碑據楊震碑高陽令名著震孫也碑在陝府閩鄉

文翁石柱記

右漢隸不著書撰人名氏初文翁為蜀郡守始立學校  
至安帝永初中以火災被焚惟廟門兩石闕獲存獻帝  
時太守高朕重修立之又於其東別築周公禮殿碑以  
初平五年立在益州

魏大饗碑

右隸書不著書撰人名氏亳州圖經以為梁鵠書魏文

帝初即王位將伐吳南行至醯饗軍士耆老於故宅此碑其元年上兩字缺不可見當為延康元年也在亳州魏帝廟中

魏魯孔子廟碑

右不著書撰人名氏字為隸書魏文帝黃初二年封議郎孔羨為宗聖侯奉孔子祀詔魯立廟置吏卒守衛魯人立此頌碑在兗州

樊常侍碑



右漢隸不著書撰人名氏常侍名安字子佑南陽湖陽人宮至中常侍追贈騎都尉此碑并追贈制書同刻以延熹三年立在唐州湖陽縣

玄儒婁先生碑

右隸書不著書撰人名氏先生名壽字元孝南陽人隱居不仕以教授為業碑延熹中立在光化軍乾德縣壽墓之側

老子銘

右漢陳相邊韶撰字為隸書不著名氏世以為蔡邕書  
據碑延熹八年八月桓帝夢見老子尊而祀之韶時典  
其禮因而為銘碑在亳州衛真縣太清宮

曹騰碑

右漢隸不著書撰人名氏騰桓帝時官至中常侍長樂  
太僕封費亭侯追加兼諫議印綬碑無所立年月在毫  
州

桂陽周府君碑

右漢隸不著書撰人名氏韶州圖經云郭蒼撰初桂陽有瀧水人患其險太守下邳周憬字君光頽山鑿石以通之延熹三年故吏區祉刻石以紀功并祉等故吏題名者二十二人在韶州樂昌縣昌樂瀧上周君廟中

### 桐柏廟碑

右漢隸不著書撰人名氏南陽太守盧奴

碑缺不見姓

君延

熹六年重修桐柏廟作此頌桐柏淮源也碑在鄧州

### 修西嶽廟復民賦頌

右隸書不著書人名氏漢弘農太守樊毅上尚書表也  
毅使從事荀班華陰令先譙繕治獄廟并復華下十里  
民田租口算以其事表上光和二年也碑久埋沒唐興  
元元年華陰令盧倣求得而為之記八分書於碑末在  
華州

楊公碑陰題名

右漢隸無名氏題名可見者十五人皆稱故吏在閭鄉  
楊氏墓側不知何人碑陰也并漢殘碑題名附首尾殘

缺存者四十餘人又有衙令修廟題名最完可見者曰  
朔方臨戎孫羨太守仇君察孝廉遷衙令到官立祠刊  
石其後列時人姓名所出錢數然亦不言所立為何祠  
也碑延熹五年立

朱龜碑

右不著書撰人名氏字為隸書龜字伯靈廣陵人官至  
幽州刺史碑以中平中立

碑缺不見年數

在亳州

劉寬碑

右漢隸不著書撰人名氏寬字文饒弘農華陰人靈帝時官至太尉封還鄉侯謚曰昭烈此碑故吏李謙等所立在洛陽

劉寬碑

右漢隸不著書撰人名氏寬門生殷苞等立不知所立年月在洛陽

孫叔敖碑

右漢隸不著書撰人名氏叔敖事迹著於史傳然皆謂

之叔敖而已獨此碑言其名饒叔敖乃字也其他事迹  
與史傳同延熹三年期思令光碑亡其姓為之立廟及此碑  
在光州

穀阮神君碑

右漢隸不著書撰人名氏中條山有石隄樹谷常湧溢  
為患故立穀阮泄其水注之於渭自前漢時立廟以祠  
之其後阮稍堙塞廟亦毀廢後漢鄭縣令裴暉字君光  
復浚阮立廟碑以光和四年立井縣丞夏龔等題名者

六十三人在華州鄭縣

樊毅修華嶽廟碑

右隸書不著書撰人名氏據碑漢光和二年弘農太守河南樊毅字仲德初至郡親祠西嶽以其齋室逼窄使縣令胸忍先謹繕治之明年正月己卯而就立此碑在華州

祝睦碑

右漢隸不著書撰人名氏睦字元德濟陰己氏人桓帝



時官至山陽太守碑以延熹七年立在南京虞城縣

范式碑

右漢隸不著書撰人名氏式字巨卿山陽金鄉人後漢時官至廬江太守獨行之士也此碑文字斷缺其字及鄉里皆不可見魏青龍三年縣長薛名缺為之立廟建碑在金鄉

祝睦後碑

右漢隸不著書撰人名氏睦故吏王堂等所立其所敘

述與前碑同在南京虞城縣

殘碑

右隸書今殘缺之餘所存者數十字而有其名字曰高字幼德其他皆不可知也

修孔子廟器表

右隸書不著書撰人名氏據碑孔子甥顏氏居魯親里妃亓官氏居安樂里魯相河南京人韓勅字叔節復其里中繇役以尊孔子孔子廟所藏舊車見毀於秦項之

際京修立宅廟造柎桓瑟鼓之屬更作二輿時桓帝永壽二年也碑在兗州

泰山都尉孔君碑

右隸書不著書撰人名氏孔君名宙字季將孔子十九世孫後漢桓帝時為泰山都尉以疾致仕碑以延熹七年立在兗州

吳雄修孔子廟碑

右隸書不著書人名氏其奏曰司徒雄司空戒言魯前

相瑛言孔子廟褒成侯四時祀已即去有禮器無常人掌領乞置百石卒史出王家錢給饗禮元嘉三年奏制曰可司徒司空下魯相承書從事選年四十通經藝者永興元年相平等言司徒司空府除文學掾魯孔龢如牒并為贊刻於後吳雄河南人字季直趙戒成都人字意伯瑛姓乙字少卿平原高唐人碑在兗州

張表碑

右漢隸不著書撰人名氏表字元異嘗為冀州從事後

去官不仕而終碑以建寧中立在冀州

郭中候碑

右隸書不著書撰人名氏中候名已磨滅不可見而字  
有其下一字曰奇河內汲人仕至北軍中候碑以建寧  
五年立在河陽

司隸從事郭究碑

右漢隸不著書撰人名氏究字長碑缺汲人也官至司隸

從事碑以中平元年立在河陽

田君碑

右漢隸無書撰人名氏田君名字皆缺亡不可見東平陽人也延熹中太山琅邪盜起以選為費令碑以永康中立在沂州

堯母碑

右隸書不著書撰人名氏堯母慶都葬於成陽立黃屋其上謂之靈臺歷代常奉祠之至王莽而絕後漢故廷尉碑缺請於朝復立其廟及濟陰太守審晃修營之以

建寧五年立此碑在曹州濟陰

魯相晨孔子廟碑

右建寧二年魯相晨長史謙表言臣到官謁孔子宅而無公出酒脯之祠輒依社稷出王家穀春秋行禮以事上尚書并有銘辭皆隸書在兗州

楊君碑陰題名

右隸書凡故吏故民處士等百有餘人在閭鄉楊氏墓側碑陰

無極山神廟碑

右隸書光和四年太常耽丞敏表上尚書言中山男子  
高遷等為無極山索法食乞少府給珪璧制曰可後有  
銘辭在定州

劉曜碑并陰

右隸書不著書撰人名氏曜字季尼東平無鹽人仕至  
光祿勳碑缺不見其卒葬年月碑陰有門生故吏題名  
及所出錢數在鄆州



石經遺字

右古文篆隸三體凡八百二十九字後漢熹平中校定  
五經使蔡邕以三體書今其石亡失皆盡皇祐中有蘇  
望者得摸本左傳於故相王文康家取其完者而刻之  
莫辯其真偽也在洛陽蘇氏家

小黃門譙君碑

右隸書不著書撰人名氏君名敏字漢達碑以中平四  
年立

太尉劉公碑陰

右隸書故相國別部司馬王曜等數百人皆有所出錢  
數劉寬故吏共為寬立碑因記於碑陰唐咸亨元年寬  
十五世孫湖城公爽重立此碑又為記刻於後不著書  
人名氏又有寬子松碑陰題名漫滅不見者今過半矣  
皆在洛陽

武榮碑

右漢隸不著書撰人名氏榮字含和桓帝末官至執金

吾丞碑不書其鄉里及卒葬年月

郎中鄭固碑

右漢隸無書撰人名氏固字伯堅延熹中仕至郎中

武班碑

右不著撰人名氏嚴祺字伯魯隸書君名班字宣

下一字缺

數煌人碑以建和元年立今其文字磨滅姓名鄉里粗得其髣髴而官爵事迹皆不可復知矣

魯峻碑

右隸書不著書撰人名氏峻字仲嚴高平昌邑人官至屯騎校尉以病去位門生于商等追謚曰忠惠父碑以熹平中立在今濟州

公昉碑

右不著書撰人名氏公昉成固人碑不書其姓名公昉乃字也耆舊相傳云公昉以王莽居攝中及其妻子室屋牛馬皆升天後漢漢中太守郭芝修其廟立此記不知所立年月在興元

豪長蔡君頌

右不著書撰人名氏字為隸書君名堪字子德河內脩武人碑以光和中立在鎮府

郎中王君碑

右隸書不著書撰人名氏碑石剥缺其間可見者曰季輔漢中太守之孫餘不復可讀而其額曰漢郎中王君銘故知其姓氏官闕耳

太尉陳球碑

右隸書不著書撰人名氏球字伯真後漢光和中位至太尉不知所立年月

北海相景君碑

右隸書不著書撰人名氏景君任城人嘗為北海相終於益州太守碑文厯厯可見而不著君之名字蓋北海故吏諸生之所立也漢安二年立在任城

金鄉守長侯君碑

右隸書不著書撰人名氏君名成字伯盛山陽防東人

碑以建寧二年立

王元賞碑

右隸書不著書撰人名氏碑以延熹四年立王君嘗為封丘令辟司空府元賞其字也碑已漫滅元賞之名及其鄉里皆不可見故以其字稱之

元節碑

右隸書不著書撰人名氏君名立字元節出於伊尹之後其姓氏爵里卒葬之年月皆不可辯然其隸字甚古

所以知為漢碑也

張壽碑

右漢隸不著書撰人名氏壽字仲吾官至竹邑侯相碑  
以建寧元年立

無名碑

右隸書不著書撰人名氏漢司隸從事之碑以光和四  
年立文字缺滅亡其姓名鄉里故謂之無名碑

司隸校尉楊君碑



右隸書不著書撰人名氏文為韻語然其事迹粗可考  
見其所頌者楊君復余谷之路也永平中始詔開余谷  
中間西羌亂道絕不通復由子午谷險阻為患司隸校  
尉犍為武陽楊厥孟文請廢子午道復由余谷建和二  
年漢中太守王升稚紀為之刻石頌德其所謂余谷者  
蓋斜谷也漢人用字多從省文如此耳碑在興元

孔君碑

右隸書不著書撰人名氏孔君名缺不可識其字曰元

上孔子十九世孫官至河東太守碑以建寧四年故吏  
王沛等立在兗州

費府君碑

右隸書不著書撰人名氏君名況字仲慮官至梁相碑  
不載其鄉里及刻石年月在今南京

樊毅碑

右隸書不著書撰人名氏漢光和二年華陰太守樊毅  
修嶽祠記也并唐貞元三年檢校太子庶子董叔經等

十五人題名附在華州

北嶽廟碑

右隸書不著書撰人名氏文字磨滅者多不可悉考其中間有稱光和四年元氏左尉上郡瑋其意若瑋被選舉而立此銘以報神貺在定州

碑陰題名

右隸書殘缺不完其可見者數十人在陝府閩鄉楊氏墓側

慎令劉君墓碑

右隸書不著書撰人名氏劉君名氏缺有其字曰伯麟仕至慎令棄官終於家其卒葬之年月缺滅不明而隱隱可見疑為建寧四年也碑在南京下邑縣

周伯著碑

右其字畫如隸書而甚古怪又多磨滅伯著者莫知為何人其時世亦不可考但其文有曰伯著者渤海君玄孫季景長子而其額曰周末嗣某氏

某字不可識

襲興興上

又缺一字渤海君玄孫伯著之碑而已然則周亦非伯著之姓也碑在宿州

袁良碑

右隸書不著書撰人名氏良字卿卿上一字缺陳國扶樂人歷議郎符節令嘗為三老其額曰國三老袁君碑碑以永建中立在今開封扶溝

王君闕

右漢人闕銘二其一篆書曰漢故永樂少府將作賈君

之闕而將作下二字缺不可識其一隸書曰漢故兗州刺史雒陽令王君之闕而王君下亦缺二字

堯祠碑

右隸書不著書撰人名氏文字漫滅者多其大略曰漢纂堯之緒祠以上犧王莽僭漢壇場夷替又曰後舊典造立靈廟以一太牢春秋秩祠陳國鄭字缺一故太守仲

又缺一字廣宗長仲選共立壇墀刊碑紀德李木連理生於

堯祠太守河南張寵繼擬前緒以錢二千敬致禮祠臨

立壇碑時熹平四年也碑在濟陰

碑陰題名

右隸書不知其為何碑之陰無書人名氏刻石年月

張公廟碑

右隸書不著書撰人名氏字多訛缺雖事迹粗可見而不復成文其間有銘辭凡二首漢朝歌長鄭柳以和平元年為張公立碑於廟又為監黎陽營謁者李君作歌九章同刻其後有李君等題名亦訛缺不可辯矣在黎

陽

碑陰題名

右凡二本皆隸書前本皆稱舊吏門生後本皆諸曹史  
騎吏及萬年蓮勺等鄉有秩各有所出錢數

西嶽廟碑

右不著撰人名氏書佐郭香察隸書延熹四年弘農太  
守袁逢以嶽廟故碑磨滅改立碑作銘會遷為京兆尹  
後太守孫璆成之碑以延熹八年立在華嶽其後有唐



人題名

孔德讓碣

右漢隸不著書撰人名氏孔君名缺德讓其字也孔子  
二十世孫仕至郡諸曹史碑以永興中立在兗州孔氏  
墓林中

孔宙碑陰

右泰山都尉孔宙碑陰題名凡六十二人其四十三人  
稱門生八人稱故吏一人稱故民十人稱弟子皆隸書

不著書人名氏宙碑在別卷

楊震碑陰題名

右隸書不著書人名氏題名者百九十餘人皆著鄉里  
姓字而不名在漢太尉楊震碑陰

唐君碑

右隸書不著書撰人名氏唐君名缺字正南潁川鄆人  
歷潁陽令遷豫章最後徙昌陽令故從事等刊石立頌  
中間文字或完或缺不得其詳其後又題曰處士閭

一缺

字班戀念唐君為立碑表蓋去思碑也光和六年立

綏民校尉熊君碑

右隸書不著書撰人名氏熊君名喬字舉舉上一字缺  
不可識後漢末為桂陽曲紅長拜綏民校尉遷騎都尉  
灌陽長而卒其銘辭之後又曰長沙蔡陵長文春字季  
秋重安侯相杜暉字慈明皆略有所敘述碑以建安二  
十一年立

敬仲碑

右隸書不著書撰人名氏碑石刊缺其人之名氏皆不可知而碑首有敬仲二字故以為名其間有云拜治書侍御史又曰光和四年卒其他不可詳也

衡方碑

右隸書不著書撰人名氏方字興祖平陸人位至步兵校尉碑以建寧中立

俞鄉侯季子碑

右隸書不著書撰人名氏君名熊字孟孟下缺一字廣

陵海西人漢之宗室父封俞鄉侯此其德政碑也但曰  
來居此邦而不書其郡縣之名不著所立年月在今揚  
州

堯祠祈雨碑

右孟府君堯祠祈雨碑隸書不著書撰人名氏碑以延  
熹中立在曹州濟陰

景君碑

右隸書不著書撰人名氏文字訛缺其首曰惟元元下

缺二字蓋其年號也又曰謁者任城景君卒其餘雖時有完者不可考矣景君石槨銘附其文曰惟元初四年三月丙戌景君卒以五年二月葬又曰司空太常博士舉高經君為其元其後遂曰以病喪身蓋文多訛缺此其粗可見者也皆在任城

郝閣頌

右不著撰人名氏漢仇紼隸書據碑所載析里郝閣皆地名也其地有溪水漂溢為患太守河陽李會使衡官

掾仇審作大橋於析里以建寧五年立此頌在興元

費鳳碑

右石勛撰隸書不著書人名氏鳳字伯簫漢安中厯守  
故鄣堂邑長勛自稱鳳舊家中孫文悉為五字句不著  
所立年月

右歐陽君集古目錄一卷君名棐字叔弼六一翁之  
季子也仕至太常少卿直龍圖閣君佩趨庭之訓讀  
父之書撫其略而目之凡集古所藏歐陽公未嘗無

說獨三體石經置而弗論豈有所疑而未決乎叔弼  
遂定作漢刻蓋為儒林傳所誤中常侍曹騰死漢遣  
諫議大夫以特進印綬贈之而此云贈騰為諫議非  
也其載碑碣所出如劉熊碑在酸棗而云揚州費汎  
碑在湖州而云南京則有不可盡信者

隸釋卷二十三



欽定四庫全書

隸釋卷二十四

宋 洪适 撰

會稽都尉路君闕銘  
南武陽功曹闕銘

王稚子闕銘  
謁者景君表

景君碑陰  
郟令景君闕銘

國三老袁君碑  
西嶽石闕銘

北海相景君碑  
景君碑陰

敦煌長史武班碑

武氏石闕銘

費亭侯曹騰碑

司隸楊厥開石門頌

吳郡丞武開明碑

祝長嚴訢碑

從事武梁碑

平都侯相蔣君碑

孔子廟置卒史碑

東海相桓君海廟碑

孔君碣

韓明府孔子廟碑

吉成侯州輔碑

州輔碑陰

州輔墓石獸膊字

郎中鄭君碑

丹陽太守郭文碑

議郎元賓碑

孫叔敖碑陰

封丘令王元賞碑

王元賞碑陰

冀州刺史王純碑

王純碑陰

蒼頡廟人名

陳皋令任伯嗣碑

任伯嗣碑陰

平輿令薛君碑

泰山都尉孔宙碑

孔宙碑陰

西嶽華山廟碑

老子銘

荊州刺史度尚碑

車騎將軍馮緄碑

魯相晨謁孔子冢文

廣漢縣令王君神道

金鄉守長侯君碑

柳孝廉碑

衛尉卿衡方碑

沛相楊君碑

淳于長夏承碑

金石錄上

余自少小喜從當世學士大夫訪問前代金石刻詞以  
廣異聞後得歐陽文忠公集古錄讀而賢之以為是正  
謬謬有功於後學甚大惜其尚有漏落又無歲月先後

之次思欲廣而成書以傳學者於是益訪求藏畜  
凡廿年而後粗備上自三代下訖隋唐五季內自  
京師達於四方遐邇邦絕域夷狄所傳倉史以來古  
文奇字大小二篆分隸行草之書鍾鼎簠簋尊敦  
鬲卣槃扞之銘詞人墨客詩歌賦頌碑志叙記之  
文章名卿賢士之功烈行治至於浮屠老子之說  
凡古物奇器豐碑巨刻所載與夫殘章斷畫磨滅  
而僅存者畧無遺矣因次其先後為二十卷余之

致力於斯可謂勤且久矣非特區區為玩好之具而已也蓋竊嘗以謂詩書以後君臣行事之迹悉載於史雖是非褒貶出於秉筆者私意或失其實然至其善惡大節有不可誣而又傳之既久理當依據若夫歲月地理官爵世次以金石刻攷之其抵牾十常三四蓋史牒出於後人之手不能無失而刻詞當時所立可信不疑則又攷其異同參以他書為金石錄卅卷至於文辭之媿惡字畫之工

拙覽者當自得之皆不復論嗚呼自三代以來聖  
賢遺迹著於金石者多矣蓋其風雨侵蝕與夫樵  
夫牧童毀傷淪棄之餘幸而存者止此爾是金石  
之固猶不足恃然則所謂二千卷者終歸於磨滅  
而余之是書有時而或傳也孔子曰飽食終日無  
所用心難矣哉不有博奕者乎為之猶賢乎已是  
書之成其賢於無所用心豈特博奕之比乎輒錄  
而傳諸後世好古博雅之士其必有補焉東武趙

明誠序

會稽東部都尉路君闕銘

右路君闕銘二其一云會稽東部都尉路君闕永平八年四月十四日庚申造其一云君故豫州刺史溫令元城令公車司馬令開陽令謁者議郎徵試博士路君不知為何人按漢書志建武六年省諸郡都尉唯邊郡往往有之豈會稽邊海故置此官歟又任延嘗為會稽西部都尉而此云東部疑當時會稽分東西部各置都尉



史不載爾

南武陽功曹闕銘

右南武陽功曹墓闕銘云南武陽功曹鄉耆夫又云以  
為國三老又云章和元年其它族系名字皆磨滅不可  
考究墓在今沂州有兩闕其一銘元和中立文字尤殘  
闕難讀

王稚子闕銘

右王稚子闕銘二其一云漢故先靈侍御史河內縣令

王君稚子闕其一云漢故兗州刺史洛陽令王君稚子之闕按范曄後漢書循吏傳王渙字稚子嘗為溫令而刻石為河內令者蓋史之誤渙以元興元年卒然則闕銘蓋和帝時所立也

謁者景君表

右謁者景君表其額題漢故謁者景君墓表而其文云惟元初元年五月丁卯故謁者任城景君卒其他文字磨滅時有可讀處皆斷續不復成文矣元初安帝時年

號也此在漢時石刻中殘缺為甚特以安帝以前碑碣  
存者無幾不可棄也故錄之

景君碑陰

右謁者景君碑陰其前題云諸生服義者又云義士北  
海掾張敏字公輔弟子濟北荏平審尊字伯尊凡十五  
人皆完好可讀云

郟令景君闕銘

右郟令景君闕銘云維元初四年三月丙戌郟令景君

卒又云君存時恬然無欲樂道安貧信而好古非法不言治歐陽尚書傳祖父河南尹父步兵校尉業門徒上錄三千餘人又云三司聘請流化下邳又云司空太常博士竝舉高經君為其元假涂郟城姦邪洗心又云被病喪身歸於幽冥門人服義百有餘人按漢人為景君刻銘本欲傳於不朽而不著其族系名字何哉

國三老袁君碑

右國三老袁君碑按元和姓纂云袁幹封貴鄉侯始居

陳郡為著姓八代孫良生昌璋昌生安璋生滂為司徒  
唐書宰相世系表云袁生玄孫幹封貴鄉侯八世孫良  
二子昌璋昌成武令生安璋生滂以此碑及後漢書攷  
之姓纂與唐表殊為踈謬袁安列傳云安祖父良平帝  
時舉明經為太子舍人建武中至成武令今據此碑良  
以永建六年卒相距蓋百餘年以此知非一人無疑又  
安以永平四年薨良之卒乃在其後三十九年以此知  
非安之祖亦無疑也蓋安汝南汝陽人滂乃陳郡扶樂

人其鄉里族系亦自不同而安與滂相去歲月甚遠不得為從父兄弟明矣豈二人之祖其名偶同遂爾差謬邪又此碑與李利涉編古命氏皆云良幹五世孫而姓纂唐史皆以為八代孫碑云幹袁生之曾孫而唐史以為玄孫諸書皆云幹以討公孫勇功封貴鄉侯而碑獨作公先勇又云封關內侯食遺鄉六百戶者皆莫可考安列傳稱祖良為成武令而唐史謂昌為此官者疑唐史之誤也又酈道元水經注扶溝城北有袁梁碑云梁

陳國扶樂人事與碑合唯水經誤以良為梁爾袁氏自漢以來世為著姓安與滂皆一時顯人而諸書於其族系錯謬如此以此知典籍所載其失可勝道哉

### 西嶽石闕銘

右西嶽石闕銘云永和元年五月癸丑朔六日戊午弘農太守常山元氏張勲為西嶽華山作石闕高二丈二尺其後為韻語文詞頗怪又字多假借時有難曉處永和漢順帝晉穆帝姚泓皆有此號穆帝時華陰不屬晉

以此碑字畫驗之恐非姚泓時蓋漢刻也又按晉書載  
記姚興與泓傳本朝宋莒公紀年通譜皆云泓以義熙  
十二年即偽位改元永和獨帝紀作十一年未知孰是  
因考永和年號并記之

北海相景君碑

右北海相景君碑在濟州任城縣景氏在漢世為任城  
人今有三碑尚存余皆得之此碑最完

景君碑陰



右景君碑陰按後漢書百官志注河南尹官屬有循行  
一百三十人而晉書職官志州縣吏皆有循行今此碑  
陰載故吏都昌台丘暹而下十九人皆作修行他漢及  
晉碑數有之亦與此碑陰所書同豈循脩字畫相類遂  
致訛謬邪碑陰又有故午營陵是遷等六人名姓莫知  
其為何官又台丘不見於姓氏書惟見於此者兩人云

敦煌長史武班碑

右敦煌長史武班碑歐陽公集古錄云漢班碑者蓋其

字畫殘滅不復成文其氏族官閥卒葬皆不可見其可見者君諱班爾今以余家所藏本考之文字雖漫滅然猶歷歷可辨其額題云漢故敦煌長史武君之碑知其姓武而官為敦煌長史也碑云君諱班字宣張昔殷王武丁克伐鬼方元功章炳勲藏王府官族析分因以為氏知其名字與氏族所出也又云永嘉元年卒知其卒之年月也

武氏石闕銘

右武氏石闕銘云建和元年太歲在丁亥三月庚戌朔  
四月癸丑孝子武始公弟綏宗景興開明使石工孟季  
季弟郊造此闕直錢十五萬孫宗作師子直四萬開明  
子宣張仕濟陰年二十五曹府君察舉孝廉除敦煌長  
史被病云歿苗秀不遂嗚呼哀哉士女痛傷武氏有數  
墓在任城開明者仕為吳郡府丞綏宗名梁仕為郡從  
事宣張名班皆自有碑

費亭侯曹騰碑

右費亭侯曹騰碑云惟建和元年七月二十二日己巳  
皇太后曰其遣費亭侯之國為漢輔藩而歐陽公集古  
錄乃言皇帝若曰其遣費亭侯之國誤也按後漢書建  
和元年桓帝即位梁太后臨朝稱制蓋此碑所載遣騰  
之國詔書乃梁太后非桓帝也東漢自安順已來閹豎  
尊寵用事往往封侯貴顯其後騰之孫操及其曾孫丕  
再世數十年憑藉勢力卒移漢祚而有之以此觀之閹  
豎用事之禍可勝言哉

司隸楊厥開石門頌

右司隸楊厥開石門頌余嘗讀范曄後漢書鄧騭傳有云時遭元二之灾人士饑荒章懷太子注以謂元二即元元也古書字當再讀者即於上字下為小二字後人不曉遂讀為元二或同之陽九或附之百六良由不悟致使乖舛今岐州石鼓銘凡重言者皆為二字明驗也其說甚辨學者信之今此碑有曰中遭元二西戎虐殘橋梁斷絕若讀為元元則為不成文理疑當時自有此

語漢書注未必然也

吳郡丞武開明碑

右吳郡丞武開明碑云君字開明而其名已殘闕又云永和二年舉孝廉除郎謁者漢安二年遷大長秋丞長樂大僕丞永嘉元年罷母去官復拜郎中除吳郡府丞壽五十七建和二年十一月十六日遭疾卒其可見者如此其他摩滅不能盡讀按後漢書志大長秋丞一人秩六百石本任宦者又長樂少府位長秋上及職吏皆

宦者又有太僕二千石在少府上丞六百石據志所載  
中宮及長樂宮官屬皆以宦者為之而以史傳及漢魏  
石刻參考如大長秋少府之類皆雜用士人今武君以  
孝廉為郎謁者郎中吳郡府丞皆非宦者之職然則兩  
宮官屬蓋亦雜用士人也

祝長嚴訢碑

右祝長嚴訢碑政和中下邳縣民耕地得之碑云惟漢  
中興郊金休烈和平元年歲治東宮星屬角房月建朱

鳥中呂之均萬物慈射華澤青葱蚊行蠕動咸守厥常  
人物同受獨遭灾霜顛實徂落壽不寬弘經設三命君  
獲其央年六十九又云伊歎嚴君諱訢字少通兆自楚  
莊祖考相承招命道術治嚴氏春秋馮君章句又云幼  
為郡掾史會稽諸暨尉烏程毗陵餘暨章安山陰長以  
病去官後為丹陽陵陽丞守春穀長舉廉遷東牟侯相  
下邳祝長典牧十城所在若神其後有銘銘為五言頗  
殘闕難讀云



從事武梁碑

右從事武梁碑云故從事武掾諱梁字綏宗體德忠孝  
岐嶷有異治韓詩闕幘傳講兼通河雒諸子傳記又云  
州郡請召辭疾不就安衡門之陋樂朝聞之義又云年  
七十四元嘉元年季夏三日遭疾隕靈其後有銘云懿  
德玄通幽呂明兮隱居靖處休曜章兮樂道忽榮垂蘭  
芳兮身沒名存傳無疆兮其他刻畫皆完可讀文多不  
盡錄碑在濟之任城余崇寧初嘗得此碑愛其完好後

十餘年再得此本則闕其最後四字矣

平都侯相蔣君碑

右平都侯相蔣君碑文字殘闕其名字官闕皆不可考  
惟其額題漢故平都侯相蔣君之碑而碑云年六十有  
五元嘉二年三月甲午卒爾有劉季孫景文者知名士  
與余先公有舊家藏金石刻千餘卷既歿其子不能保  
為一武人得之其後余故人王偁定觀復得數百卷其  
中漢碑數本余所未有者悉以見贈此其一也

孔子廟置卒史碑

右孔子廟置卒史碑其前有司徒吳雄司空趙戒奏章  
歐陽文忠公具載於集古錄其後又有魯相奏記司徒  
司空府文字尤為完好云永興元年六月甲辰朔十八  
日辛酉魯相平行長史事卞守長擅叩頭死罪敢言之  
司徒司空府壬寅詔書為孔子廟置百石卒史一人掌  
主禮器選年四十以上經通一藝雜試能奉弘先聖之  
禮為宗所歸者平叩頭叩頭死罪死罪謹按文書守文

學掾魯孔龢師孔憲戶曹史孔覽等雜試龢修春秋嚴氏經通高第事親至孝能奉先聖之禮為宗所歸除龢補名狀如牒平惶恐叩頭死罪上司空府其詞彬彬可嘉故備錄之且以見漢時郡國奏記公府其體如此也按華陽國志後漢書注皆云趙戒字志伯而此碑乃作意伯疑其避桓帝諱故改焉

東海相桓君海廟碑

右東海相桓君海廟碑云惟永壽元年春正月有漢東

海相桓君又云熹平元年夏四月東海相山陽滿君其餘文字完者尚多大略記修飾祠宇事而其銘詩有云浩浩倉海百川之宗知其為海廟碑也桓君與滿君皆不著其名莫知為何人碑在今海州

### 孔君碣

右孔君碣在孔子墓林中其額題孔君之墓文已殘闕其前云元年乙未而元年上闕二字按東漢自建武以後惟桓帝永壽元年歲次乙未其他有三乙未皆非元

年然則此碣所闕二字當為永壽也

韓明府孔子廟碑

右韓明府孔子廟碑其略云君造立禮器樂之音符鍾  
磬瑟鼓雷洗觴觚爵鹿柎桓籩柎禁喜修飾宅廟更造  
二輿所謂鹿者禮圖不載莫知為何器又據字書柎木  
皮可為索喜陳樂也亦非器名皆不可曉故并著其語  
以俟知者

余後見汶陽陳氏所藏古彝為伏鹿之形近  
歲青州獲一器亦全為鹿形疑所謂鹿者因

其形而  
名之爾

吉成侯州輔碑

右吉成侯州輔碑名字已殘闕其額題云漢故中常侍  
長樂太僕吉成侯州君之銘輔名姓見范曄後漢書宦  
者傳以定策立桓帝與曹騰等七人同時封為亭侯今  
此碑載當時詔書有云其封輔為葉吉成侯以此知其  
名輔而酈道元注水經云湫水南有漢中常侍長樂太  
僕吉成侯州苞冢冢前有碑其詞云六帝四后是諸是  
詠今驗其銘文實有此語獨以輔為苞蓋水經之誤當

取漢史及此碑為正

州輔碑陰

右州輔碑陰京兆尹延篤叔堅而下題名者凡四十餘人自東漢以後一時名卿賢大夫死而立碑則門生故吏往往寓名其陰蓋欲附託以傳不朽爾今輔一宦者而碑陰列名者數十人雖當代顯人如延叔堅亦預焉有以見權勢之盛如此雖然區區掛名於此者亦可恥也夫



州輔墓石獸膊字

右州輔墓石獸膊字鄺道元注水經云州君墓有兩石獸已淪沒人有掘出一獸猶不全破甚高壯頭去地丈許制作甚工左膊上刻作辟邪字余初得州君墓碑又覽水經所載意此字猶存會故人董之明守官汝潁間因託訪求之踰年持以見寄其一辟邪道元所見也其一乃天祿字差大皆完好可喜之明又云天祿近歲為村民所毀辟邪雖存然字畫已殘闕難辨此蓋十年前

邑人所藏今不可復得矣

郎中鄭君碑

右郎中鄭君碑賈誼過秦論云九國之師遁巡而不敢  
進顏師古曰遁音千旬反流俗書本巡字誤作逃讀者  
因之而為遁逃之義潘岳西征賦云遁逃以奔竄斯亦  
誤矣今此碑有云推賢達善逡遁退讓詳其文意亦是  
逡巡之義然二字決非一音蓋古人用字與後世頗異  
又多假借故時有難曉處不知顏氏何所據遂音遁為

遂乎

丹陽太守郭旻碑

右丹陽太守郭旻碑云君諱旻字巨公有周之裔也又云治律小杜幼仕州郡舉孝廉除郎中謁者遷敬陵園令廷尉左平治書侍御史獄刑無頗憲臺如砥以父憂去官選拜郎中侍御史遭母憂服除復拜郎中治書侍御史遷冀州刺史徵拜尚書是時淮夷蠹逆帝疇官綏策書褒屢俾守丹陽為政四年以公事去官年過耳順

寢疾瘠頽延熹元年十月戊戌卒其十二月丙申葬微  
言絕矣諸子曷仰三載禮闕迺羣相與刻石勒銘最後  
云昔君即世雖立碑頌裁足載字加有瑕下闕君之弟  
故太尉薨歸葬舊陵於是從子故五原太守鴻議郎某  
及胤孫某其石殘闕懷祖之德乃更刻石不改舊文蓋用昭  
明祖勲焉郭氏為陽翟著姓自公以來世以通法律顯  
名此碑所謂太尉公者禧也

議郎元賓碑

右議郎元賓碑者在今亳州姓名已殘闕所可見者云  
字元賓魯相之孫又云舉孝廉除倉龍司馬衛尉察尤  
異遷吳令視事二稔民用康寧州辟從事公車徵拜議  
郎年四十八延熹二年二月卒使者臨弔賻贈特加其  
餘文字完好者尚多惜其名氏皆亡也

孫叔敖碑陰

右孫叔敖碑陰云延熹三年中夏之節政在封表期思  
長光視事一紀訪問國中耆年素聞孫君楚時良輔又

云博采遺苗曾玄孫子考龜吉辰五月癸卯宜以存廢  
可立碑祀招請諸孫都會國右郭西道北處所顯好與  
上牢祭倡優鼓舞又云相君有三嗣長子即封食邑固  
始少子在江寧中子居三

下一字  
磨滅

又云相君卒後十有

餘世有渤海太守其後歷敘子孫名字甚詳而文字斷  
續不可次第按期思長光碑陰不載姓氏叔敖碑雖有  
之然已殘闕矣漢時令長有在官一紀不遷者乃知前  
世官吏重於移易如此不惟吏民免送迎之擾而士人

亦皆安於其職無僥倖苟進之心與後世異矣

封丘令王元賞碑

右封丘令王君碑其姓名已殘闕所可見者字元賞而已云察舉孝廉郎謁者考工苑陵葉封丘令而銘文亦有撫臨三國之語歐陽公集古錄云為苑陵丞者蓋誤以葉字為丞爾

王元賞碑陰

右王元賞碑陰載門生姓名有云右奔器右斬杖三年

余嘗謂聖人之制禮為可繼也無過與不及之弊務合於中庸而已禮曰事師無隱服勤至死心喪三年孔子之喪門人疑所服子貢曰昔者夫子之喪顏淵若喪子而無服喪子路亦然請喪夫子若喪父而無服彼漢人為王君乃為斬衰之服於禮無乃過乎

冀州刺史王純碑

右冀州刺史王純碑延熹四年立桑欽水經云濟水逕須句城西酈道元注濟水西有安民山山西有漢冀州



刺史王紛碑漢中平四年立按地里書須胸即今中都縣此碑在中都又其官與姓氏皆合疑其是也然以純為紛以延熹為中平則疑水經之誤

王純碑陰

右王純碑陰其前題門人姓名自東平馮定伯而下文字完好可識者百九十餘人磨滅不可識者又九十餘人字畫淳勁可喜其後題義士名云各發聖心共出義錢埤碑石直刊紀姓名埤當讀為裨助之裨漢時墓碑多

其門生故吏所立往往各紀姓名於碑陰或載所出錢數其非門生故吏而出錢者謂之義士今漢人為王君出錢造碑而云各發聖心可謂陋矣

蒼頡廟人名

右蒼頡廟人名歐陽公集古錄云此碑有蓮勺左鄉有秩池陽左鄉有秩池陽集水有秩皆不知是何名號又有夏陽候長祿祠候長則是縣吏之名其隸字不甚精又無事實可考姑疑其名號以俟知者爾按前漢書張

敞以鄉有秩補太守卒史後漢書百官志鄉置有秩三  
老游徼本注曰有秩郡所署秩百石掌一鄉人注引漢  
官儀曰鄉戶五千則置有秩風俗通曰秩則田間大夫  
言其官裁有秩爾然則有秩蓋亦鄉吏名也

成皋令任伯嗣碑

右成皋令任伯嗣碑其首已殘闕其可見者云字伯嗣  
南郡編人也其先蓋任座之苗胄又云舉孝廉除郎中  
蜀郡府丞江州令以服去官為筑陽侯相延熹五年遷

來臨縣其後歷敘政績又云遷君桂陽最後云都邑謠  
詠甄勒勛績永昭於後碑在今汜水縣汜水在漢為成  
皋此碑蓋成皋令德政頌爾後漢書桓帝紀延熹八年  
有桂陽太守任胤以此碑校之歲月相符又名與字協  
知其名胤也

任伯嗣碑陰

右任伯嗣碑陰大觀初獲此碑寘於汜水輦運司廨舍  
壁間余聞其陰有字因託人諷邑官破壁出之遂得此

本蓋漢碑有陰者十七八世多棄而不錄爾

平輿令薛君碑

右平輿令薛君碑文字完好云惟延熹六年春二月平輿令薛君卒烏虜哀哉吏民其咨咨君之德迺建碑石於墓之側其後有銘三百餘言敘述甚詳惟不載其名字世系故莫得而考焉

泰山都尉孔宙碑

右泰山都尉孔宙碑孔北海父也見後漢書融列傳又

據桓帝紀泰山都尉元壽元年置延熹八年罷宙以延熹四年卒蓋卒後四年官遂廢矣

孔宙碑陰

右孔宙碑陰門生有鉅鹿廣宗捕巡字升臺按氏族書如姓苑姓纂皆無捕姓獨見於此碑爾

西嶽華山廟碑

右西嶽華山廟碑其略云孝武皇帝修封禪之禮巡省五嶽立宮其下宮曰集靈宮殿曰存仙殿門曰望仙門

歐陽公集古錄云所謂集靈者他書不見見於此碑爾  
余按班固漢書地理志華陰有集靈宮武帝起而酈道  
元注水經亦云敷水北逕集靈宮引地理志所載其語  
皆同然則不獨見於此碑矣而所謂存仙殿望仙門者  
諸書不載

老子銘

右老子銘舊傳蔡邕文并書蓋杜甫李潮小篆八分歌  
有曰苦縣光和尚骨立書貴瘦硬方通神世云此碑是

也今驗其詞乃邊韶延熹八年作非光中所立未知  
甫所見是此碑否而本朝周越書苑遂以為韶撰文而  
邕書初無所據碑言孔子學禮時計其年紀聃已二百  
餘歲聃然老旄之貌也而史記言謚曰聃按古謚法無  
聃字又碑云孔子以周靈王二十年生今以年表及世  
家考之孔子以魯襄公二十二年生實靈王二十一年  
未知孰是史書周太史儋事云孔子死後二百二十九  
年徐廣注曰實一十九年今此碑所書正與史合不知



徐廣何所據也

荊州刺史度尚碑

右度尚碑其首題曰漢故荊州刺史度侯之碑碑云其  
先出自顓頊與楚同姓熊

下闕  
一字

之後又曰統國法度其

下殘闕不可辨按元和姓纂度姓但云古掌度之官因  
以命氏不言其與楚同姓也又范曄後漢書列傳度尚  
自右校令擢為荊州刺史破長沙零陵賊以功封右鄉  
侯遷桂陽太守徵還京師以中郎將破賊胡蘭等復為

荊州刺史後為遼東太守卒於官今以碑考之云封右鄉侯遷遼東太守拜中郎將復拜荊州刺史以故秩名蓋尚未嘗為桂陽太守而曰卒於遼東者皆史之誤余每得前代名臣碑板以校史傳其官閥歲月少有同者以此知石刻為可寶也

車騎將軍馮緄碑

右車騎將軍馮緄碑以范曄後漢書考之史云字鴻卿而碑云皇卿史云初舉孝廉七遷至廣漢屬國都尉拜

御史中丞順帝末持節揚州諸軍事與中郎將滕撫擊破羣賊今據碑自舉孝廉至為廣漢屬國都尉凡十一遷而為中丞與督使徐揚二州討賊皆在為都尉前碑云討賊時坐迫州縣正法而史不載又云為隴西太守坐問吏辜旬不分去官以羗駭動為四府所表復家拜隴西太守而史但言遷隴西太守耳史云為遼東太守徵拜京兆尹轉司隸校尉遷廷尉太常拜車騎將軍以碑考之緄為遼東太守以前嘗復為治書侍御史遷尚

書遂為廷尉未嘗拜京兆尹及司隸也史云振旅還京師監軍使者張敞承宦者旨奏緄會長沙賊復起攻桂陽武陵緄以軍還盜賊復發策免而碑云臨當受封以謠言奏河內太守中常侍左悺弟坐遜位史云復拜廷尉時山陽太守單遷以罪繫獄緄考致其死遷故車騎將軍超之弟中官相黨遂共誹章誣緄坐輸左校而碑云表荊州刺史李膺南陽太守成晉

晉漢史作璿

太原太守

劉瑱不宜以重論坐正法作左校亦皆不合史又云為

河南尹時上言舊典中官子弟不得為牧人職帝不納  
拜屯騎校尉復為廷尉卒於官而碑云復廷尉奏中官  
子弟不宜典牧州郡獲過左右遜位永康元年薨亦當  
以碑為正碑又云緄謚為桓而史亦不載余嘗謂石刻  
當時所書其名字官爵不應差誤可信無疑至於善惡  
大節則當以史氏為據今此傳首尾顛倒錯謬如此然  
則史之所載是非褒貶失其實者多矣果可盡信耶

魯相晨謁孔子冢文

右魯相晨謁孔子冢文已斷裂闕其上一段其略可見者云建寧元年三月十八日丙申晨又云其四月十一日戊子到官謁孔子冢其他文字雖完皆不可次第魯相晨有兩碑皆在孔子廟中其一碑云臣蒙恩受任符守得在奎婁周孔舊寓又云臣以建寧元年到官其一碑云魯相河南史君諱晨字伯時從越騎校尉拜以建寧元年四月十一日戊子到官然則斯碑所載名晨者蓋魯相史晨也

廣漢縣令王君神道

右廣漢縣令王君神道建寧元年十月造縣令字作苓  
漢人淳質文字相近者多假借用之如縣令字人所常  
用而尚假借何耶

金鄉守長侯君碑

右金鄉守長侯君碑載其上世云漢興侯公納策濟太  
上皇於鴻溝之阨謚曰安國君曾孫酺封明統侯光武  
中興立孫霸為臨淮太守擁兵從光武平定天下轉拜

執法刺姦五威司命大司徒公封於陵侯歐陽公集古錄云執法左右刺姦五威司命皆王莽時官侯霸列傳云霸莽時為隨令遷執法刺姦而未嘗為五威司命後代伏湛為大司徒封關內侯既薨光武下詔追封則鄉侯而此碑言封於陵侯未知孰是據碑言刺姦司命為光武時官蓋碑之謬余按霸列傳霸薨追封則鄉侯至子昱改封於陵而遂以霸為於陵侯疑亦碑之誤又按高祖紀侯公說項羽歸太公呂后乃封侯公為平國君



今此碑言安國既不同而平國君乃生時稱號如婁敬  
為奉春君之類碑以為謚恐亦非是又酺封明統侯漢  
書功臣表亦不載不知碑何所據也

### 柳孝廉碑

右柳孝廉碑云君諱敏其先蓋五行星

下闕  
一字

二十八舍

柳宿之精也其說亦可謂怪矣自戰國以來聖人不作  
諸子百家異端怪說紛然而起其弊至東漢而極焉自  
非豪傑之士卓然不為流俗所移未有不從而惑者也

若此碑直以柳君得姓出於柳宿果何所據哉

衛尉卿衡方碑

右衛尉卿衡方碑有云感昔人之凱風悼蓼儀之劬勞以蓼莪為蓼儀也漢碑多如此蓋漢人各以其學名家故所傳時有異同也

沛相楊君碑

右沛相楊君碑歐陽公集古錄云碑首尾不完失其名字余按楊震碑沛相名統震長子富波侯相牧之子也

淳于長夏承碑

右淳于長夏承碑云君諱承字仲充東萊府君之孫太尉掾之中子右中郎將弟也累葉牧守印紱典據十有餘人皆德任其位名豐其爵是故寵祿傳於歷世策勲著於王室君鍾其美受性淵懿含和履仁治詩尚書兼覽羣藝靡不尋暢州郡更請屈已匡君為主薄督郵五官掾功曹上計掾守令冀州從事又云察孝不行太傅胡公歆其德美旌招俯就羔羊在公四府歸高除淳于

長又云年五十有六建寧三年六月癸巳淹疾卒官碑  
今在洺州元祐間因治河隄得於土壤中建寧靈帝時  
年號也距今千歲矣而刻畫完好如新余家所藏漢碑  
二百餘卷獨此碑最完



隸釋卷二十四